

摘藻堂四庫全書薈要

史部

欽定四庫全書薈要

史部

硃批諭旨卷一百二十六之二十一

詳校官編修臣繆晉

欽定四庫全書薈要卷八千六十

史部

硃批諭旨卷一百二十六之二十一

硃批田文鏡奏摺

雍正八年五月二十三日河東總督臣田文鏡謹

奏爲欽奉

聖訓據實覆奏事雍正八年五月二十二日據臣齋摺

家人回豫捧到

皇上硃批

諭旨於臣請以克州府知府王鴻勳補用克寧道缺摺
內欽奉

硃批克寧道一缺從前嵇曾筠曾薦托克托海以爲人
地相宜今覽卿奏但云以王鴻勳補授之處與嵇曾
筠面商意見相同而並未言及托克托海朕觀二人
似屬皆可卿等就中酌一允協者具題請旨但期要
缺得人何論陞遷之遲速則例之合否耶前日保題
之諭原料卿等自必仍保托克托海非謂托克托海

不可用而命另揀別員也恐錯會朕意故諭及之欽
此臣查山東兗寧道缺與河南管河道缺先後俱
奉

諭旨命臣會同河臣嵇曾筠揀選題補臣因兗寧一道

不但管轄黃運堤工并有分巡地方之責必須諳
悉河防而又曉暢吏治者乃克勝任兗州府知府
王鴻勳久於河工曾任鄭州濱河要地歷陞知府
才識幹練其於山東兗寧道缺可稱駕輕就熟至

河南管河道缺專理河務無地方之責托克托海在豫日久熟練河工辦事勤敏其於河南管河道缺亦爲駕輕就熟臣與嵇曾筠數次面議相同是以擬將王鴻勳請補克寧道托克托海請補管河道其嵇曾筠摺薦托克托海可爲克寧道之處竝未向臣言及所以臣

奏請王鴻勳補用克寧道摺內未將托克托海敘入聲明今蒙

聖諭命臣二人酌一相宜者具題請

旨但托克托海臣等已經會同具

題請補河南管河道缺在案其兗寧道缺王鴻勳洵
爲人地相宜謹將原委備細

奏明可否將托克托海補授河南管河道將王鴻勳
補授山東兗寧道伏候

聖裁除遵

旨具

題外爲此繕摺請

旨謹

奏

如此可謂人缺各得其宜矣

同日又

奏爲

聖恩之垂念彌深臣心之感激難已欽奉

聖訓謹再據實覆奏事竊臣前奏恭請

皇上聖安摺內欽奉

硃批朕安知卿精神體氣健旺如初甚爲欣慰但已年
近古稀切勿逞力自矜於一切處慎重愛惜爲宜莫
辜負諄諄訓諭之意可也欽此 臣伏讀

聖諭恭聞

聖躬乾健

景福日隆犬馬下懷欣忭無既至 臣過蒙

眷顧

天語春溫仰承

訓旨感激涕零竊臣以去冬不自慎重感冒風寒上履
宸念

君父篤愛之懷有加無已臣每切不安撫心自疚是以
恪遵

聖訓加謹調護春後漸次痊愈而精神體氣均得復初
茲復蒙我

皇上鴻慈垂注

訓諭叮嚀雖慈親之於愛子無以喻其懇摯臣何人斯
仰邀

顧復至於此極在臣有生之年悉爲報

恩之日敢不欽凜

聖諭一切惜養庶藉衰鈍之軀少效駕駘之力但臣左
腮頰上素有舊疾近今三四年來每春輒患腫痛
即從腮內出膿數日旋愈率以爲常今春亦復腫
發却於頰外出膿其出膿之所尚有小孔未經收

口忌風射入臣倍加謹慎前因疾同疥癬未敢瑣瑣奏

聞惟是

天恩深渥淪浹肌髓臣現延有外科加意療治今已將次平復至臣之身體較之昔年稍弱實已別無他恙相應據實具奏仰慰

聖念伏乞

睿鑒爲此繕摺恭謝

天恩謹

奏

御體無恙朕懷深慰惟宜加意調攝凡爲封疆大吏者當思此身上爲國家宣力下爲蒸黎造福愛惜保護凡百酌量精神而動不至勞乏致疾方謂能遵朕訓汝其謹誌毋違

雍正八年六月初八日河東總督臣田文鏡謹

奏爲恭報豫省雨澤日期仰祈

睿鑒事竊查豫省五月十四十五十六十七等日節次
得雨分寸透足情形經臣恭摺奏

聞茲查開封府屬地方於六月初二日未時至申時得
雨四寸初三日未時又得雨四寸而各屬州縣亦
於六月初二三四等日各得雨三四五寸不等四
處調勻沾被所有高糧穀黍棉花芝麻雜豆等項
均各滋盛非常民間欣望有秋謹將得雨日期分
寸恭摺奏

聞仰慰

聖懷再山東各屬州縣有報於五月十四十五等日得
雨四五六七寸者有報於五月十六十七十八等
日得雨七八九寸以至四野透足不等者合併

奏明伏乞

睿鑒謹

奏

節序已屆季夏正當大雨時行之際惟恐過多耳何須

奏報沾足

同日又

奏爲欽奉

上諭事竊臣接准部咨奉

上諭福建巡撫員缺著河南布政使趙國麟補授河南
布政使員缺著河南按察使陳世倬署理河南按察
使印務著田文鏡委員署理欽此臣隨轉飭欽遵茲
查趙國麟於本年五月十七日卸事其布政使印

務陳世倬當即接受署理訖該員補授按察甫經
一載今復仰荷

天恩簡署藩篆陳世倬感激

聖慈彌矢圖報臣益策勵有加務令殫誠盡職上副

隆眷至所遺按察使印務臣查豫省所屬道員內如河
北道朱藻目下伏秋屆汛一切河工堤岸正資督
率稽察未可刻離南汝道董自超所轄地方界連
江楚近因汝寧守費謙流丁憂離任現又委其兼

攝府事彈壓緊要亦不便調赴會城惟查開歸道
張建德監兌漕運爲期尚早該道又駐劄在省隨
就近委令兼署所有河南按察使印務臣謹遵
旨委員署理緣由理合恭摺

奏明再趙國麟忠厚謙謹臣甚愛之敬之惟辦事尚
欠閱歷不能裁決悉當臣見其虛心善受隨事詳
明指導期與精進今蒙

恩簡任巡撫臣念福建爲濱海要地習俗刁悍兵民狡

點綏輯爲難臣昔佐縣閩中最所深悉趙國麟雖自閩藩調任風土情形諒亦畧諳惟巡撫職任封疆振綱挈領肅清吏治贊畫軍戎更非藩司可比趙國麟誠樸和平安靜有餘而風力經濟尚覺未逮是以臨行之際臣諄諄勉以嚴明自持整飭爲務甄察屬員懲戢姦暴寬嚴互濟冀得上副

聖明委任之重臣緣受

恩深厚圖報時殷不但本省屬吏訓勵最切每遇各員

遷陞別省臣於其地方事宜苟有所知必爲備述
原委確指利弊總期吏治民生均有裨益以無負
聖恩茲趙國麟已於六月初二日自豫起程赴濟寧州
候

旨臣謹一併

奏明伏乞

睿鑒謹

奏

覽奏知道了命趙國麟莅任閩撫實係不得已之舉朕求賢若渴苦衷向誰告耶

通政使革職從寬留任臣留保謹

奏臣閱邸抄見因四川道員職守不專

皇上特頒諭旨令嗣後將所轄州縣命盜錢糧各案俱由道員申轉以專職守臣查山東有濟東道轄濟東二府直隸泰濱武高濮五州登萊青道轄登萊青三府直隸莒州一州兗寧道轄兗州

一府直隸東平曹沂三州凡所轄州縣之命盜
錢糧各案俱直達兩司竝不由道審理申轉亦
與四川無異再聞各省中道員亦多有不由其
審理申轉事同一例應請

敕下各省督撫畫一遵行以專職守伏祈

皇上聖鑒臣謹奏

聞

留保條奏之摺發來卿看其是否之處酌議奏聞

同日又

奏爲覆奏事雍正八年五月十五日據臣齎摺家人
回豫恭捧

皇上發下通政使臣留保條奏一摺奉有

硃批臣欽遵查得守巡各道職任監司所屬州縣刑名
錢穀案件若止詳藩臬而不申報道員則道員於
地方事宜無案可據雖有統屬之名竝無稽督之
實硃非設官本意伏讀

上諭令四川各州縣案件俱由各道申轉所以飭吏治
而重職守者

聖明固已無微不照也向來東省州縣命盜錢糧等案
除分報撫臣及臣衙門并布按二司外仍申報該
管道員至事關糧務鹽務驛站河工之叅案則各
由專管道員會同藩臬司審轉是東省州縣各案
原係申報道員隨事可以查察非如川省州縣全
不由道申轉毫無關涉者可比惟是各省命盜等

案州縣止申報道員而不解道審轉者誠以藩臬
兩司爲通省錢穀刑名總匯故定例錢穀由藩司
審轉刑名由臬司審轉而各道分守分巡但今稽
察督催而不與以審轉之權其經畫定制之初良
有以也在藩臬雖云總匯然錢穀刑名各專其責
今若以州縣錢穀刑名案件俱令各道審轉縱所
轄非係通省而本任專管之外加以錢穀刑名任
兼藩臬之事即有肆應之才恐亦日不暇給況承

審案件多一衙門則多需時日多一審轉又多增
案牘上下申移頭緒愈繁且人犯多拖累之苦解
役多守候之艱而各道盤查巡歷或差委公出亦
不能常在署中解到人犯未能即審押禁等待益
慮疎虞滋弊道員向無承審之責招案多未練達
姦胥或因之而舞弊刁犯或藉此而狡展輾轉稽
延非徒無益伏思命盜錢糧歷經州縣府司逐層
研審方解督撫再加親鞫成誠可謂詳且慎矣似

不必復令道員審轉多經一手故各省州縣命盜
錢糧率不由道審轉此亦勢使然也臣試論東省
道員內如濟東一道通省驛站馬匹錢糧是其綜
核登萊青道整飭海疆全資巡歷克寧道管轄黃
運河工千有餘里疏築修防事尤繁劇即豫省道
員內如管河道任重宣防開歸道辦理漕務兼管
通省驛鹽河北南汝兩道或兼吏治河防或任分
巡彈壓其於所屬命盜錢糧東豫兩省道員竝難

責其審轉再臣恭繹

上諭四川州縣案件俱令由道申轉竝未有令道審轉
之

諭旨而東省各屬案件現皆申報道員豫省亦是職
守竝無不專所有留保請將州縣命盜錢糧由道
審轉之處似無庸置議臣謹據實覆

奏是否有當伏乞

皇上睿鑒謹

奏

分割甚屬明悉可即繕疏具題俾直省各督撫咸知卿有此議也

同日又

奏爲郡守才不勝任據實

奏明仰請

睿鑒事竊查東省萊州府知府王榮賜前任河南新鄉縣令臣因該員爲人誠實辦事勤慎經臣

題補陝州知州送部引

見奉

旨俞允該員於雍正七年正月內到任陝州即於本年
五月內奉

旨補授萊州府知府臣於其赴任時又面加訓勵王榮
賜感激

聖恩亦自言力圖報效及其到任以後臣察知辦理郡
務竭蹶不遑臣因其初爲知府民情庶政或未熟

悉復隨事訓飭不憚諄諭切指該員雖深自奮勉
向上無如限於才智迄今一載未見整飭之效甚
覺勉強臣恐所聞未確又復致詢撫臣岳濬亦言
該守人雖樸實稽其政務接其言論誠難勝任等
語臣思萊郡海疆臣等既察知王榮賜難勝斯任
何敢因循貽誤但王榮賜居官尚屬謹飭可否遵
照甄別知府之

上諭請將王榮賜以在京部屬改補所遺萊州府員缺

仰懇

聖慈另簡能員補授庶邊海要郡整飭得人倘蒙

恩允臣與撫臣岳濬再當合詞具

題至東省登青二府亦屬濱海地方其署登州府知府姚庭槐經臣由膠州牧

題請署理登郡試看勝任再請實授茲查該員到任未久雖無循卓出人之政亦無曠廢職守之愆尚須再爲試看青州府知府廣壽經臣由汝陽令欽

遵

諭旨於豫東兩省人員內不拘資格

題補青守到任以來雖辦事盡心才稱其缺但氣質
稍粗舉動未能悉協亦須化誨涵養此二員者容
臣與撫臣岳濬不時察查覘其後效另行據實奏
聞合併

奏明伏乞

睿鑒謹

奏

所奏皆是此萊郡一缺卿意中有勝任之人否

雍正八年六月二十二日河東總督臣田文鏡謹

奏爲奏明事竊惟學政一官宣揚風化振拔人才職

守最爲清要必得夫公矢慎衡校嚴明俾鑽營倖

進之徒無以施技逞姦則內外肅清諸弊可杜茲

查河南學臣吳應茶今已歷試彰衛懷開四府臣

見其衡文課士一秉至公實心殫力於廩結則揆

保之外增用認保互相覺察於考校則飭拏鎗手
密加巡緝以防傳遞於文章則屢加覆試詳審筆
跡於武場則合觀技藝細加甄取凡其錄進擯斥
悉皆精當不爽尤能督率提調送考等官謹凜襄
事綜理周密無可窺伺夤緣是以士論輿情翕然
稱頌至其體度峻整裁事和平更爲寬嚴悉協臣
與學臣同事地方資其整齊化導共勩

聖治臣既察知吳應茶政績卓著理合據實奏

聞再查東省學臣蔣蔚勤慎明白其劣生積欠錢糧竝
自來多事者訪實即行黜革考察教官尤無姑容
一切學政士習均能循分整飭相應一併

奏明伏乞

睿鑒謹

奏

覽奏俱悉但吳應茶平素非如此人也品行多屬不妥
似流入鑽營奔競之習近年以來始覺奮志改勉朕向

知其底裏今心行果否如一久暫有無異同卿再留意
驗視具奏以聞

同日又

奏爲奏明程家寨工程危險并搶護平穩原由仰祈
睿鑒事竊查祥符縣南岸程家寨月堤地勢窪下大河
水趨南岸原屬險要經前河臣嵇曾筠

題估邁埽加鑲在案時屆伏汛又值大雨時行該工
於六月十四日驟長水三尺八寸全河大溜盡注

該工埽外水深三丈一二尺不等堤埽墊陷臣飛
飭署開封府知府劉永錫上南河同知陳儀下埽
搶救竝調河營備弁及別汛兵夫埽手齊集保護
并差臣標把總及在省試用效力人員咸赴工所
以備委用緣十五六七等日河水日長共計五尺
五寸勢湧溜急新舊埽箇漸次漂走堤外水深四
五丈不等巨浪洪濤奔騰衝激難以下埽惟有急
加裹戩以爲後衛隨於十七日面委署布政使陳

世倅多帶錢文赴工分發買土適河北道朱藻至
省臣因其平日熟練工程辦事竭力隨又面授機
宜委令協辦朱藻到工即將員弁分派執事不辭
勞怨晝夜嚴督夫役儻築防護臣於二十日親赴
該工查看督率自十八日起至二十日辰刻水已
消落三尺查險工八十餘丈之內舊堤全刷者止
十餘丈汕去十分之六者六十餘丈其新築裏戩
現今寬有六七丈不等高與舊堤相等人夫共有

七千餘名晝夜趕築加幫高厚而堤外之水止深
一丈六七尺護崖埽箇俱已下齊現在疾僭簽加
大椿粗纜工程可保平穩其善後事宜臣細加斟
酌并搶修工料另疏具

題外所有程家寨工程危險及搶護平穩情形理合
恭摺奏

聞此外黃運兩河工程伏汎將過均屬平穩合併
奏明恭慰

聖懷臣因該工水勢平緩裏戩外埽均已指示趕辦復
嚴諭在工大小員弁分督兵夫星夜儻修完固臣
即於二十一日回署辦事再管河道員缺前奉

諭旨令臣與前河臣嵇曾筠揀選

題補臣等因上南河同知托克托海在工年久熟悉
河務而又時屆伏汛不便乏員隨一面委護道篆
一面

題請實授臣以托克托海必當殫心竭力奮往向前

豈期於此等要工不思急爲搶護反因朱藻到工
心懷嫉妬退縮不前查托克托海自十六日到工
之後曾具一稟到臣第言水勢汹涌竝不言及在
彼如何搶護如何督率臣已疑其不悉心經理隨
委署按察司鹽驛道張建德赴工查看托克托海
竟隨協理河臣范時繹安坐一旁張建德差人邀
伊看工不至隨又詣其坐處云工程何等危險如
何在此閒坐托克托海答云我在此看守裏頭埽

又云沒見朱藻分派單子張建德隨將分派單子
交給托克托海插入靴內仍然端坐不動張建德
見其玩工形狀因云護道在此陪坐我看工去了
范時繹隨云我們也同去看看未幾托克托海又
回原處安坐總之督率稽察搶理之事托克托海
絕不在意至在工夫役托克托海亦不約束查察
其有乘晚逸去者竟置不問經朱藻將一夫頭責
懲夫役始凜然不敢偷閒臣查該工危險異常職

事員弁人役猶知凜惕上緊而托克托海獨不以險工爲念一味妬才嫉能挾私廢公若不嚴行叅究則在工人員無所懲勸臣是以繕疏

題叅不敢自避保題失當之咎而稍爲劣員回護也至協理河臣范時繹奉

旨令其防汎稽察臣於初見之時聽其言論似屬明白私心竊喜謂可助臣不逮今值此險工未見有督率之方稽察之明如玩工之托克托海連日侍坐

其旁而不知督責其才識已大槩可見矣臣蒙
皇上恩遇至深委任至重臣不敢不據實一併奏

聞統祈

睿鑒爲此謹

奏

據實糾參一無回護朕深爲嘉與托克托海如此玩誤
工程實屬大奇所以云小人之心不可以常情測度也
題本到日另有諭旨

同日又

奏爲奏明事竊臣所住衙署最後一院有樓房七間
東西廂樓各三間臣因此樓間曠無人居住遂於
樓後供設家堂香火早晚掃除之外即將院門扃
鑰茲於六月十七日早家人換點香燭將所用火
煤紙不知誤遺何處未及查看鎖門而出及至飯
後忽見樓房煙起啓門入視火已燃上頂榻窓櫺
其梁柱年久枯燥見火即燃頃刻之間樓頂塌下

遂將火勢壓住惟東廂樓爲火燄所射亦即塌下
所幸是時無風兵役各攜救火器具協同家人登
時撲滅附近之西廂樓并兩耳房俱未延燒至臣
所住正房及堆貯文卷處所相距更遠竝無燬失
此雖臣之家人不戒實臣供職多愆以致火災示
警然樓房高敞當火起之初樓頂立即塌下不致
火燄遠及須臾即熄則又仰賴我

皇上福庇所賜臣惟有省躬思過益加凜惕夙夜不懈

而已所有臣署失火情由理合據實奏

聞因所燒係數間空房竝無燬失文卷未敢具本題報

合併

奏明謹

奏

此等事何必具本題報據云火災示警等語朕意默默
中事最難知從來聖賢之所不能免者或化大爲小亦
未可定惟於方寸間切毋存怨天尤人之念

雍正八年七月初八日河東總督臣田文鏡謹
奏爲河工需員甚殷仰請

聖恩簡發以備差委事竊照黃運兩河工程均關緊要
時屢

睿念指示修防臣蒙

皇上殊恩

特命掌管北河印務夙夜兢兢惟有恪遵

聖訓倍加謹慎期於河流安瀾堤岸鞏固上慰

聖懷第河道綿長事務紛繁如修守防險稽察趨督在
在需員而管河同知通判及沿河州縣又例應

題補非諳練河工不足以供任使非在工學習不能
驟至諳練今查前河臣嵇曾筠移送効力人員冊
開已經取結咨部者除陸續

題補竝現在委署及告假緣事回籍外僅有二員在
工其餘未經咨部取結共計四十餘員現在查取
家道殷實印結其是否俱係殷實尚難懸定況皆

係州同州判縣丞主簿雜職及生監微末人員多
係到工未久於修防事宜全然未悉止可在工學
習奔走且爲數無多苦不敷用臣思河防重務必
須多得人員預爲學習庶臨時差委不致乏人遇
缺亦可量才委署

題補臣謹仰懇

聖慈敕部在於候選候補同知通判知州知縣內
簡發十員赴北河効力雖此等人員平日未歷河干河

務非其通曉但得明白勤幹之人在工學習自可
望其進益以備差委再効力人員例應取本籍家
道殷實印結如蒙

俞允

簡發人員到工臣即遵例查取印結咨部留工効力合
併聲明伏乞

睿鑒謹

奏

河工効力人員候朕酌定有旨諭部

同日又

奏爲恭請

簡發人員以資吏治事竊照吏治在乎得人而用人必
因其材臣查豫省數年以來屢蒙

皇上簡發各項人員

命臣酌量委署試用使地方所出員缺即可因地量材
斟酌委署實於地方吏治均有裨益今查試用人

員或經臣

題署或現在委試所餘不過數員而其才情識見僅
在中平止宜於簡小地方若緊要繁劇州縣缺出
即乏人署理是以臣每遇一要缺即審酌再四難
得其人至於同知通判常多差遣公出又有陞遷
事故其所管水利糧務督捕等事亦需人署理若
令知府首縣護理未免不能兼顧臣謹仰懇
聖慈於在京候補候選同知通判知州知縣內

簡發二十員到豫俾臣得就中酌選量才委署不致臨
期乏人可收臂指之用如內有才猷敏練識見老
成試有成效者臣又可於應題要缺酌量

題補臣仰體

皇上慎重地方造就人材至意謹繕摺

奏請伏乞

睿鑒謹

奏

亦候酌定有旨

同日又

奏爲程家寨工程穩固再行

奏明仰慰

聖懷事竊照祥符縣南岸程家寨前因汎水驟長大溜
直射漂汕堤埽隨經臣將工程危險及搶護情形
恭摺奏

聞今查該工自六月十八日起水勢漸次消落又對岸

切去灘嘴四百餘丈溜歸中泓隨督率人夫晝夜
僭築裏戩今已一律完固堤外又下護崖埽及沉
水大埽密簽長椿倍加粗纜僭做堅實今險下移
復於下首加裏戩鑲防風以資捍禦而該工西首
又得迴溜之勢水緩沙停逐漸淤成嫩灘全將埽
壩包裹查七月初六日探量得頭壩水深僅四寸
六寸不等中壩水深五寸下壩水深七寸伏查該
工前此北高南低勢如建瓴埽外水深四五丈不

等洪濤衝激危險無比今竟大溜北趨埽外淤出
嫩灘再遲數日即可淤平似此危險呼吸之勢轉
爲至平極穩之工皆由我

皇上至誠感格

天 祖

河神默佑因而化險爲平如此神速然臣不敢以工
程已幸平穩稍爲懈怠惟嚴督在工人員更加謹

慎將南北兩岸堤埽各工先事綢繆務期鞏固再
山東運河自六月十五日起至二十六七風雨交
作宣洩不及濟寧嘉祥鉅野魚臺汶上等處湖河
亦有漫溢今幸天氣晴霽水漸消落臣已飛飭道
廳等官上緊修堵并將緯道墊妥務使回空糧艘
進行無礙其一切應修工程及動用存庫盈餘夫
錢之處容臣確核另

奏合併聲明伏乞

睿鑒謹

奏

當茲雨水過盛之際概宜加詳加慎爲之

雍正八年七月十五日河東總督臣田文鏡謹

奏爲彙奏東省被水州縣并陳賑恤事宜仰祈

睿鑒事竊照兗州府屬之滋陽濟寧曲阜魚臺金鄉汶

上曹州屬之嘉祥鉅野等八州縣於六月二十四

五六七等日連得大雨又汶泗二河水勢漲溢民

間房屋以及窪地田禾不免被淹坍損俱經臣據報飭司委查隨恭摺奏

聞今續據濟南府屬之歷城長山章邱淄川齊東新城
兗州府屬之泗水嶧縣寧陽東昌府屬之聊城堂
邑朝城范縣莘縣冠縣青州府屬之樂安臨淄直
隸沂州東平州并州屬之東阿直隸泰安州并州
屬之新泰萊蕪直隸莒州屬之蒙陰東平等二
十四州縣一所各報稱本年六月二十一至二十

六七等日風雨交作山水陡發河水驟長平地水深數尺傍山臨河處所并窪下地方房屋多有倒塌田禾不免被淹除飛飭山東布政司委員確勘其被水情形聽撫臣岳濬

題報外臣查東省濟寧等州縣連朝大雨雖日期間有先後參差總在此旬日之內以致山水河水竝發一時容洩不及是以山隈水涯及低窪地方水勢漫溢田禾難免被淹而民間又多係草房土墻

本不堅固所以易被坍塌損然此雨水過多皆臣奉
職多愆

上天示儆臣據報之下不勝悚惶惕懼伏思

皇上愛養黎元無所不至雍正三年山東雨水偶多上
厪

聖念特頒

諭旨詳察生計蕭條升斗無資以及田地被淹不得收
穫房廬倒塌不安厥居者一面賑恤等因欽遵在案

其時被水窮民咸沐

皇恩不致一夫失所今濟寧等州縣被水村莊不無資
生無策之窮民可否將生計蕭條升斗無資以及
田地被淹不得收穫房屋倒塌不安厥居者動用
存倉穀石賑濟大口每月給穀三斗小口每月給
穀一斗五升各給兩箇月口糧貧民可不致有乏
食之虞再其中或有極貧之人雖給以倉穀餬口
有資而無力修理房屋棲身無所可否於藩庫克

公銀內每戶酌給銀一兩五錢以爲修理房屋之費則被水窮民咸得安居粒食共戴浩蕩之

皇仁於無既矣如蒙

皇上俞允臣即檄飭藩司并令該管道府督同地方官實心詳察給散務期

皇恩下究民沾實惠此臣愚昧之見應否如此辦理伏候

聖裁再運河水勢臣委官查勘現今已經消落臣嚴飭

道廳汎員修補緯道不悞糧艘回空黃河兩岸工
程甚屬平穩豫省秋禾高粱早穀早黍現在刈穫
恐墮

聖懷合併奏

聞謹

奏

所奏是卽照議作速辦理仍另有諭旨今歲直隸各省
被水處甚多非止山左此數州縣皆緣朕躬偶失調攝

不能克盡孜孜勤敬之道而又悲痛吾弟怡親王溘逝
未免有傷

天和所致實朕之咎非卿等之過也至若卿等於臨民
莅政之際有無寬猛失宜緩急不當亦自應悉心體究
我君臣期共修省以感格

天心而已

雍正八年七月二十五日河東總督臣田文鏡謹

奏爲敬推

皇仁奏請

睿鑒事雍正八年七月二十二日臣接准戶部咨文因江南河臣嵇曾筠奏報黃運兩河水勢情形欽奉上諭將邳州宿遷桃源等處

恩賜賑濟又因山東發水之處民間田舍亦被損傷特命撫臣岳濬遴選賢能官員查勘動支庫銀速行賑濟并應行蠲免錢糧之處確查奏

聞等因臣查東省州縣夏秋之間連降大雨山水河水

一時竝發容洩不及至有漫溢臣陸續據報隨經
兩次恭摺具

奏乃臣

奏摺未到之前已蒙

聖明遠照

綸綍飛頒臣跪讀之下既慶萬姓沾沐

皇恩之大又愧微臣聞知

奏報之遲隨即移咨山東撫臣岳濬并飛行山東布

政使孫國璽欽遵速行在案今查山東被水州縣
除臣前此

奏明外又續據濟南府屬之齊河濟陽青城肥城鄒
平兗州府屬之鄆城城武鄒縣濟寧衛東昌府屬
之館陶邱縣清平東昌衛青州府屬之益都高苑
博興壽光諸城臨朐萊州府屬之昌邑濰縣高密
直隸泰安州屬之長清直隸武定州濱州并州屬
之蒲臺霑化直隸曹州并州屬之曹縣直隸沂州

屬之費縣郟城直隸東平州之平陰壽張直隸濮
州并州屬之觀城直隸高唐州并州屬之禹城直
隸莒州并州屬之日照沂水等三十八州縣二衛
各申報被水情形到臣計前後共七十州縣三衛
所臣思該州縣衛所各呈報被水雖其中自有輕
重不等而一州一縣之內其村莊亦各有高下之
殊然現在委員查勘所有新舊錢糧似應暫緩催
徵統俟查確之日分別應免應徵奏

聞請

旨至被水較重之州縣衛所確查實在窮民遵

旨賑濟其被水稍次之州縣查明酌借倉穀其被水較
輕之州縣將存倉穀石暫行出糶以平市價如此
則民力可舒民食有資數十州縣黎庶咸沐浩蕩
之

天恩於無既矣臣敬推

皇仁不揣冒昧一面札商撫臣岳濬斟酌料理具

奏務體

聖心使被災窮黎均沾實惠不致一夫失所以仰副我
皇上保民若赤之至意臣謹繕摺奏

聞伏乞

聖鑒謹

奏

已有諭旨矣

雍正八年八月初四日河東總督臣田文鏡謹

奏爲敬陳黃運兩河工程仰祈

睿鑒事竊臣猥以菲材荷蒙

聖恩掌管北河河道總督印務奉

命以來惟有凜遵

聖訓敬謹從事茲查豫省南北兩岸險要工程臣已嚴

飭道廳等官相機料理加意防守現在堤埽各工

俱保護平穩惟舊日大堤尚有卑薄之處前雍正

三年奉

旨增卑培薄彼時因尚非險要暫緩加幫今連年伏秋
汛漲堤外漸次淤高堤身漸覺卑矮必須急爲增
修與前此增卑培薄之工一律高寬則汛至無虞
臣現飭管河河北兩道擇其應修者親勘確估俟
估報到日臣一面具

題一面動帑興修務於來歲桃汛前完工以資捍禦
再東省運河前因水勢漲漫緯道多有殘缺糧艘
正在回空刻不容緩臣即飛飭兗寧道王鴻勳動

支庫貯節省夫價速爲分發修墊使回空無阻經

臣恭摺奏

聞臣思運河爲糧艘經行要道不可不悉心經理今雖已修殘補缺不誤回空然其間有先經

題估而詳報尚被水佔難以興工者亦有續請興修雖據估報尚應確勘者均宜相度形勢斟酌機宜分別應緩應修次第舉行爲一勞永逸之計臣已遴委在豫熟諳河務之員前往東省通行查勘俟

該員回日臣擇其緊要之工再飭寬寧道王鴻勳覆勘確估具

題請

旨總之臣受

恩深重固不敢不嚴加稽察杜屬員之捏冒侵肥亦不敢因循苟簡致工程之臨事周章但臣智識淺陋恐措施未當謹先繕摺具

奏伏乞

皇上聖鑒訓示遵行爲此謹

奏

區畫已屬合宜無庸再訓

同日又

奏爲遵

旨覆奏事雍正八年六月二十三日接准部咨內開欽
奉

上諭歸德營叅將員缺著祿鼎坤補授賞銀一萬兩令

其帶往河南爲伊置產搬家及往來盤費之用欽此
又於本年七月十一日接署兵部尚書臣三泰左
侍郎臣永壽等字內開奉

旨爾等寄字與田文鏡將祿鼎坤交與田文鏡留心教
導伊若在河南置產著田文鏡委員代伊料理欽此
仰見我

皇上以天地覆載之心廣造就生成之德懷柔竝至教
養兼施臣欽遵

諭旨將一切營伍事宜悉向祿鼎坤面加教導又敬宣
皇上恭養優待之

天恩及代爲料理置產委曲周詳之

聖意祿鼎坤感激

皇恩喜出望外其置產之處臣現委歸德府知府萬國
宣就近料理務期妥協至祿鼎坤業於七月二十
五日到歸德營叅將任臣復諭調任叅將孫宏將
營伍情形及該將在彼整理之處一一告知臣仍

當留心隨時教導所有祿鼎坤到豫及委員料理
置產緣由理合繕摺覆

奏伏乞

睿鑒謹

奏

據奏祿鼎坤已抵叅將任知道了料理甚好

同日又

奏爲覆奏

聖訓事雍正八年七月二十五日臣齎摺家人捧回臣
奏程家寨工程穩固摺內奉有

硃批臣伏查黃運兩河關係運道民生時屢

睿念臣蒙

聖恩委任悉心料理隨時調度已將委員查勘并請動
用節省夫役銀兩修築東省運河緯道緣由恭摺
具

奏現今白露已過汎水自此漸應消落各處工程俱

報平穩臣惟有欽遵

聖訓倍知詳慎督飭在工大小員弁謹小慎微極力修
防務期堤工鞏固以仰副我

皇上殷殷教誨之

聖意所有奉到原摺理合恭繳謹

奏

覽奏汎水漸消工程平穩朕心深慰

雍正八年九月初一日河東總督臣田文鏡謹

奏爲兩省河務重大敬遊協理之員仰請

聖裁事竊惟黃運兩河攸關運道民生我

皇上時廑

睿念指示修防績底平成臣蒙

聖恩掌管北河河道總督印務敢不殫精竭慮敬謹從
事以仰副我

皇上任使之

聖意惟是修防之法全在未雨綢繆而相機經理尤須

親閱情形臣職守封圻未能遍歷各工往來查看
誠恐先後緩急調度失宜必得一熟悉河務有才
有識可以深信之員與臣相助爲理不必臣親自
到工一如臣之身歷其地平險宛在心目方可斟
酌機宜次第料理庶於河工有裨臣查河北道朱
藻才幹明敏洞曉河務身任勞怨毫無瞻顧事前
識平險之機臨事得調度之法凡修理工程動用
錢糧無不嚴查確核帑無浮冒工早完固即如雍

正八年三月內荆隆口估挑引河一案該道寢食
工所督率員弁兵夫晝夜儻挑於三月二十二日
興工五月十五日告竣是日汎水即至立時開放
頃刻成河又如六月內祥符縣南岸程家寨月堤
汎水驟長全河大溜盡注該工新舊埽箇漂走堤
岸坍塌危險異常臣面授機宜委令該道赴工協
辦該道即一身兼任分派執事同署開封府知府
劉永錫等嚴督員弁兵夫儻築裏戩又以北岸暗

灘突出逼溜南射委員帶領兵夫切去灘嘴幸溜
走中泓戩堤築起埽外淤成嫩灘工程穩固又該
工東首舊堤於六月二十三日四更時巡堤官兵
稟報大漏一處孔穴如桌面寬大河水噴激堤外
勢甚汹涌危在呼吸在工員弁兵役莫不驚惶無
措該道正在督築裏戩聞之飛奔至前站立漏孔
處所挺然不動急呼家人兵役飛持隨帶綿衣綿
被并令各夫擡土填塞其時在工夫役見該道履

險如平咸奮勇爭先一擁而至隨將漏孔填塞得
免潰決凡此化險爲平功成神速固皆仰賴我
皇上至誠至敬感格

天祖

河神默祐所致而朱藻於此數事亦見其有膽有識
不辭勞瘁若以之助臣辦理實於兩省河工大
裨益臣受

恩至深感

恩至切日夜思維無可仰報惟此以人事
君之誠拳拳於中是以不揣冒昧恭摺具

奏可否將朱藻

特賜加銜協理河務

鴻恩出自

聖裁再前此辦理程家寨險工各員弁著有勞績者容

臣另摺奏

聞外所有河務重大敬遴協理之員理合據實繕摺奏
請仰祈

睿鑒謹

奏

據奏以朱藻加銜協理北河所見是候另旨諭部

雍正八年九月初四日河東總督臣田文鏡謹

奏爲奏明東省賑濟事宜仰祈

睿鑒事竊照東省被水州縣屢奉

恩旨賑恤令臣等斟酌料理仰見我

皇上軫念黎元不使一夫失所之至意臣前因被水州
縣有報稱房屋倒塌者誠恐其中有極貧之人雖
給以倉穀餬口而無力葺屋棲身無所以仰請
皇上格外天恩每戶給銀一兩五錢以爲葺屋之費荷

蒙

聖恩俞允在案今於九月初一日接到部咨內開撫臣
岳濬奏稱確勘成災者約有六十餘處每處災民

多者二萬餘戶少者亦有萬餘戶房屋倒塌十居六七若概以每戶一兩五錢散給統計所需不下百萬兩之多應分爲上中下三等極貧者每戶給銀一兩五錢次則減爲一兩再次則減爲五錢核實酌散無不均不徧之弊等語臣查報水各州縣其成災不成災之處雖尚未據布政司取結詳報然陸續接閱各道府州縣來稟并面詢因公往來員弁及差往查看之員大概不致有成災六十餘

處之多而成災之中又有輕重不等每處災民亦多寡不一臣現據鹽法道楊宏俊稟稱查過德平災民七百餘戶商河五百餘戶即此可見各州縣被災實在窮民不啻一二萬戶之多撫臣所奏每處災民一二萬之語乃未經查實僅據州縣之率報而約畧言之也至各處倒塌房屋亦非一概十居六七而倒屋之家更非盡皆無力貧民前據督糧道徐聚倫稟稱如所塌係租住之房則與住者

無涉房主既能賃房其家不貧可知何庸議賞或
房共七八間而倒三四間房共五六間而倒兩三
間房共三四間而倒一間儘可棲身何庸議賞又
如倒塌房屋本戶現經修葺不致棲身無所以及
紳衿富戶與有生理者是皆有力之家何庸議賞
臣見其查察精細分晰明白隨將所稟辦理之處
飛札各道府州一體實心辦理在案臣思賑濟原
以恤貧非以繼富況此項葺屋之費尤爲我

皇上恩外之恩但當使貧者一夫不遺原不必令富者
盡人徧及其應給葺屋之費惟最重之郊城沂州
等數處或有數千戶其餘不過千餘戶及數百戶
而止以一兩五錢計算約畧不過賞銀八九萬兩
今撫臣欲行徧給而將凡係倒屋之家分爲三等
概議賑銀則需銀四五十萬不止實不免失之太
濫我

皇上保民若赤一聞東省被水即

沛恩綸發帑發粟并將例不蠲免之漕糧

特予免徵固不惜此數十萬帑金但以賑濟之

洪恩而濫及於有力之富戶臣竊以爲措施未當也至

撫臣賑穀議內以高地有收窪地有穗可割請將

倉穀先行平糶其應賑倉穀攤作四箇月散給陸

續接濟等語更屬未協夫平糶止可及於有錢糶

買之戶而不能及於束手無措之人今若以前項

有可割收原不待賑之家而因此槩行緩賑致使

嗷嗷待哺之窮民不得早沾

聖澤似非所以仰體

皇仁而下恤民瘼也且貧民一家數口老弱強壯不等
若將口糧一時給領則貧民即可從長計議老弱
者安居粒食少壯者別爲營運今攤作四月散給
往返領賑貧民既多守候之艱陸續給散胥役更
滋捐索之弊且散穀散票多一次即多一次之事
地方散賑之員亦不免過煩臣伏見

皇上遣官賑濟畿輔地方特頒

上諭將三箇月口糧通計給發此誠

聖明洞鑒

睿慮周詳今東省賑穀臣愚以爲應照直隸通計給發
之爲妥便總因撫臣誤認凡被水者俱應銀穀並
賑故有銀分三等穀攤四月之議以致賑銀失之
太濫賑穀失之太緩查撫臣前已令查賑道員上
貧給銀一兩次貧給銀六錢下貧給銀四錢今又

不分有力無力一槩給與葺屋之費上貧一兩五錢次貧一兩又次貧五錢其如何爲上貧如何爲中貧下貧究未分析明白查賑之員更無所適從且現今查造賑銀之戶止係極貧一項今既分爲上中下三等則賑銀之戶又須另行查添矣緣撫臣奏摺內有與臣商酌施行之語臣不敢不將前後商酌不同之處據實

奏明惟是救災務速東省被水窮黎

恩綸屢沛而賑事迄今尚無就緒臣徒有勞心焦思而遠在豫省鞭長莫及賑務重大可否仰懇

皇上天恩遣一賢能大員星馳赴東督同原查之道府等官速爲斟酌散賑俾被水窮黎均得早沐

皇恩頂感無既矣臣不揣冒昧一併陳

奏是否有當伏候

聖裁謹

奏

從來賑災如拯溺救焚曷容稍緩所奏是已有旨諭部
矣



硃批諭旨卷一百二十六之二十一



總校官庶吉士臣侍朝

校對官庶吉士臣羅修源

騰錄監生臣謝惇